



Cussegliera federala Viola Amherd (a dretga) en discurs cun Alois Maissen, l'antierur cusseglier guvernativ, ed Ida Derungs, l'antierura deputada ed emprima presidenta dal cussegl grond.

FOTO G. N. STGIER

«Segirezza è in bain custaiavel»

Pcd grischuna: Radunanza da delegads

DA GION NUTEGN STGIER / ANR

■ **Giaist dals cristiandemocrats grischuns è stada Viola Amherd, la nova cussegliera federala da la pcd. Ils Grischuns han purschi a la magistrata in cordial bainvegni. La Vallesana ha prendi bler temp per discurre cun ils preschents ed uschia gudagnà anc dapli la simpatia da mintgin.** En rotscha èn ils delegads e las delegadas da la pcd grischuna vegnids en las localitads da la IBW a Cuir a far conuschientscha cun Viola Amherd, dapi in mais en uffizi sco cussegliera federala. Stefan Engler, il president da la pcd chantunala e cusseglier dals chantuns, ha ditg ch'Amherd haja empermess gia avant sia elecziun en la regenza svizra, sche quai daventia realitad, da visitar sco emprima secziun da la pcd, quella dal Grischun. Ella haja tegnì pled e sia preschientscha a la radunanza da delegads saja per la pcd grischuna pli che be onuravla.

Atmosfera fitg cordiala ed empernaivla

Cun brama spetgavan tuts che la cussegliera federala vegnia e cun bler cor è ella lura vegnida beneventada da delegads e las delegadas e da blers auters simpatisants da la pcd. Bainspert è sa mussà che la scheffa dal departament da defensium e protecziun da la populaziun e sport ha gia suenter esser be in mais en uffizi gudagnà la bainvulientscha da vegl e giuven

er tar nus. Ses sa preschentar natiral, ses carisma particular e sia vischinanza senza retegnientschas tar tuts preschents han confermà ch'Amherd è ina cussegliera federala cun blera sensibilidat, da bun cor e cunzunt er fitg simpatica.

Da Mustér fin Samignun

Insaco han ins gù l'impressiun che la nova cussegliera federala da la pcd saja en pauc temp gia s'avanzada tar ina persuonalitad, tar ina dunna plain cordialitad e tar in carstgaun fitg avert. Bel è er stà che la Vallesana è s'interessada danunder che tuts quels blers delegads e delagadas vegnian, aposta per mussar lur plaschair da sia elecziun en il cussegl federal. Vegnids èn ils amis e las amias dad Amherd propi da tut las regiuns da noss chantun, da Mustér fin Samignun e da Savognin fin Landquart.

Polarisar porta pauc

Ella haja gia fatg bunas experientschas ils davos 30 dis, ha ditg Amherd. Sia lavur saja plain tensiun, interessanta, multifara ed er pretensiusa. Gist en il temp dad oz haja la segirezza anc dapli muntada cun esser il mund adina dapli en privel. La segirtad saja bain fitg custaiavla e da quella haja er la Svizra d'avair quità, ha menziunà la cussegliera federala. Noss pajais haja da tgirar la libertad, dentant er esser avert per l'Europa, per l'entir mund e per ina collavuraziun vicendaiavla. Polarisar, be far canera e sbragir mor-

dio porta pauc. Da chattar sajan er qua en cuminanza soluziuns, da far saja politica reala ed er esser pront d'acceptar l'opiniun da mintga partenari politic.

Ina quota d'electurs da 18%

La finamira da la pcd grischuna saja da defender il sez da Martin Candinas en il cussegl naziunal e lura er ses post sco cusseglier dals chantuns, ha ditg Stefan Engler. Suenter il success tar las elecziuns chantunals il zercladur 2018 cun la cleara reelecziun da cusseglier guvernativ Mario Cavigelli e l'elecziun da Marcus Caduff en la regenza duai la pcd er avair success tar las elecziuns naziunals. La finamira saja d'augmentar la quota d'electurs da 16,7% sin da nov 18%, ha punctuà Engler. Far vuschs per la partida duaian cunzunt er ils giuven da la pcd che van en il cumbat electoral cun duas glistas. Qua ils nums dals candidats e da las candidatas da la pcd giuvna da noss chantun (tenor successiun da la glista): Tino Schneider, Severin Geisseler, Sandra Lazzarini, Sarina Caduff ed Anton Capaul. L'autra glista cumpiglia quels nums: Caterina Ventrici, Kevin Brunold, Francine Walser-Hemmi, Fabian Coltenberg e Tobias Marty. A pled è er vegnida Gianna Luzio, la secretaria generala da la pcd svizra. Ella ha cunzunt ditg che la pcd na saja betg a Berna, mabain en ils chantuns ed en las regiuns che sajan la basa per avair success tar las elecziuns naziunals.